

進賢縣志卷三

建置

周禮考工一冊載宮室城隅以及野涂溝洫之制纖悉畢
詳誠以體國經野王政之首務也古之人入其境而橋梁
治道路修且以此識賢吏焉孰謂一邑而顧可忽乎哉進
賢之署建于宋城建於明由此而以待賓旅以衛民生舉
凡候館廩藏陂澤兵防津梁郵遞迄於今規制大備矣顧
遷徙廢置代匪一端損之益之與時宜之是在良有司之
留意也志建置

建置

城池

官署

公所



城池

縣舊無城明正德五年江西盜起署知府同知汪穎建築城議知縣姚永順奉議興工旋以疾寢八年知縣王紀始創築土城爲門六門各有樓

省志作知縣朱英加砌以甃

十二年知縣劉源清以宸濠

變議加磚石未果嘉靖三十七年南贛盜發樞臣奏請郡縣無城者尅期完築時署篆同知袁株奉檄經始三十八年知縣程光甸克勤厥務更築址以石覆以石中壘以磚周一千三十丈有奇高一丈七尺厚一丈門併樓仍六東曰啟和西曰迎恩南曰來撫北曰拱極東南曰文明西南曰田治隨以水西街居民衆自來撫出入不便復闢水西門制視諸門稍隘東門城址逼

民居邑人楊重俊捐基橫四尺直十餘丈廣之城上窩鋪二十四所費帑金二萬餘萬歷三十六年大水城圯一百四十丈知縣周光祖重築四十五年知縣沈景初改東南文明門於學宮前建甲秀樓

國朝康熙三年知縣聶當世捐修

聶志

乾隆八年知縣姚夢麟

奉檄重修周一千七十丈堞口一千一百七十七個門樓七座估工一萬一千二百餘兩

羅志

道光二年日久傾圯一百零一

段計四百七十七丈一尺知縣朱楣詳請勸諭捐修

縣冊

嘉靖戊午萬浩築城記吾邑舊惟土城創自正德初今頽塌殆盡嘗議興建每沮於財力弗逮嘉靖戊午南贛寇發兵部

疏請郡縣宜尅期築城巡撫吉揚何公奉詔惟謹遍勅有司毋怠歲己未郡守韓公懷南謂進賢密邇會省爲東南巨障白諸兩道轉聞於巡按東泉鄭公議與何公克協夏初太叅敬所王公僉憲少南何公臨縣經始署縣事同知袁君株受成之餘悉心綜理用質於叔父太宰叔父曰凡民艱於議始率之則趨吾其首事焉遂領城樓一所垣二百餘丈司寇傅公司馬張公少卿汪公太守楊公相與繼之庚申春邑令程君光甸勵精初政喟然曰財資於衆出者不覺其費力分於多任者不見其勞前議官糧無差石取一錢不爲虐也在城下一錢二鄉則半之約而公矣但領役必於上戶抑孰若區

別三則因力受事之尤均乎暨縣丞呂鳳翔主簿蔡棠典史郭黼僉覈上戶不過一丈中止一丈下者量爲之助於是譁然者翕然事事矣入秋王公總臬太叅紀山曹公代之躬詣城所犒賞有差民故謹奮不加衆而力愈倍矣公以一邑巨工速成於一時恐弗堪也復偕何公請諸兩院出公帑四千餘金方伯白石蔡公北川陸公如議發給是既有濟於目前其以後加派因之而亦減矣惟時浮峯張公撫命新膺古松段公按節適至後先一體務求底績故於冬季厥工告成城週一千零三十丈厚一丈高視厚加七尺門樓六所窩鋪二十四所橋二載城於上名青龍者亦重建焉共費白金二萬

二千餘兩越程侯徵記於叔父叔父命曰城工初末心力汝勤宜有言焉浩受命拜曰天下之事未見其端自我舉之恒患於不從逮至已然又恨於不及卽連年閩廣流寇凡受禍之邑俱屬無城彼雖欲城其何能乃吾茲得以致其工力能未失可乘之天時也邑鄰撫建警息每聞而城功旣成永無駭怖上下俊傑同德共濟其人事之相值者又如此哉昨秋賊衆已渡雲山大中丞柏泉胡公入境之初駐斯經略彼西望畏沮遂爾東潰噫城之不可已也益較然矣雖然險設矣議所以守之功成矣議所以保之立法貴豫是尤有望於當事之賢者

萬曆四十五年李光元改修文明門記先師孔子廟跡王者前有觀闕禮也國中則外屏帶城者則門表焉進賢城繞文廟前顧門右曰文明文明者當塗之象也而右之門名悖而廟貌不闕觀者陋焉且學所以羣士其有門也猶士有面目心胷也將以嚮明而答四方何可以不廣示也蓋議徙門者久之萬曆四十有五年會令沈公敦獎文學亟用者俊之請毅然以爲已任新門遂成高廣爲七門冠門臺麗譙再重岌業炫燿旅揖諸峯三臺明而鳳凰翼門外治馳道而右溝植亦爲環塗第一門內爲堤唐捷之泮如莛塗如砥洞川隰於一軌唐之畔立巨材爲坊曰大成諭斯志也必博遠光偉之

儒皆於是乎出公之嘉意不與天壤俱無窮哉君子曰此三才之一會也迹余所睹記前後令之有風愛者於學宮蓋數數然矣當其時徙門之議持久不決遂安毛公未門而進志基命也厥構取厯厯而已仁和黃公新明倫堂暨名宦鄉賢祠貞教本眎物也規恢非所亟焉青浦錢公建閣於明倫堂之左曰尊經一統記也堂廉故瞰廟極閣與今門譙相睇然而門譙者廟之觀闕而學士之面目心胸也觀止矣其議不啻久其成也忽然斯非時至於天法呈於地道待其人之明效也哉故曰三才之一會也是役也本事以公俸其仞以鍰輸作以杖二十以下工始於二月四日竣於九月九日民無

知焉公名景初浙江餘姚人癸丑進士由南康調劇至屬董事者學博士吳君維翰而徐君宗賀龔君大賓並相成成之日於公調至爲浹月於公三年秩滿上計最爲前一月也萬曆四十五年熊明遇改修文明門記文明門舊建於學宮東偏道弁而隅不當山水朝宗歲丙辰沈侯日倪從薦紳先生父老子弟之請直學宮改闢焉高門且開而明堂若冠泮水若帶三臺若拱九曲若織耕之趨原田者每每也旅之出涂巷者便便也斯士譽髦之朝夕鬻宇者訢訢也美哉文明基之矣君子曰是邑必興小人日新與舊布武不百焉仍舊貫如之何熊子曰是未覩於風氣之大全人文之關紐也蓋

吾邑形勝麻榭作鎮揭以高宗山之南而蜿蜒者雲霞蔚蕩
水之東而蜿蜒者蛟龍潰薄而皆大會於邑一鍾美政事堂
臨岡面京從山秀也則水合其後一鍾美學宮坐收東汝之
注則山水俱合其前半壁中央曲江映帶自然之形理也邑
先是未有城學宮所對如天繪於時臺座鼎盛飄組雲臺者
肩摩後卽第者項背不無微遜前美且城之七門皆不當朝
宗年來市纏鮮蓋藏邑屋鮮甲宅而闔閭之煨於闕伯者十
三田圩之圯於實沈者十三今日之文明寧直學宮嘉賴乃
通邑之正門也舊建之址其涂弇其位隅其山水反走改作
之美獨君子愛乎哉蓋偏據而視陋不如審曲以宅中規小

而乖方不如面執而經大天之道也太乙當紫宮之戶也端
門正三光之庭也藩國匡天市之樓也斯其燦然者矣是故
星辰爲天文而不明於雲霧山川爲地文而不明於蓁莽精
粹爲人文而不明於蔽陷斯門也君子所履小人所視小人
難以慮始而易與樂成彼接足而朝夕近市者披三條經九
軌亦孰不喁喁欣富教之有象乎所爲可使由而不可使知
者也乃君子之至於斯觀重門之洞開瞻宮墻之儼翼於以
講論乎六藝稽合乎異同不啻披雲霧而覩天廓蓁莽而矚
地精粹之所鬱發詎止於灘合湖明之兆而已耶若夫冠裳
聚止珂玉交鳴柱笏登高當筵歌舞暇暘谷而熊嵐香嶺層

雲盪胸睨元圃而白湖漸峯飛霞照席洞陽之藪龍岐之澤
又魚龍之所吟嘯而日月之所沐浴也當斯時會且吞雲夢
八九而直凌霄漢之上矣其爲文明豈不大哉門之制聚土
爲闈環石爲穹構木爲閣埏埴爲睥睨舉以法直學宮榜曰
甲秀樓糜可六百金皆侯斥金矢不入民固由之而不知者
也

康熙乙巳熊人霖修城記天官北宮真武其宿南斗爲廟危
爲蓋屋營室爲清廟壁爲文府皆主營建版築之象而斗分
野江湖乃進賢馱以南州分野上應天光其星在龍角平道
間青青有章蓋水火之所和演陰陽之所際會地也而得其

天焉邑自唐稱鍾陵鎮而析疆伊滅肇宋崇寧間粵有明正
統初龍巖張侯冲來泣是邑相土協謀草創官司廬井正德
間秦州王侯紀稍崇飭雉堞樓櫓爲守望資迄嘉靖南顧寇
發大君有命撫臣行節增築於是太湖程侯光甸益廓之崇
正間潛山王侯揚基更增其三版今垂四十年有基勿壞城
之庇吾進邀天之福未嘗有復隍之虞矣康熙癸卯監利二
瞻聶侯以名進士宰是邑後繭絲先保障劍及垣屨及城見
雉之明者或湮亢者或俯且城上不得並驅倘然介馬而馳
之爭取螯弧先登奚由控縱聚吏士咨詢之曰茲邑其肇有
寧宇何敢以興雖然處秦之上六而有惕然復隍之虞居安

進賢縣志 卷三
思危又奚敢恃陋且邑爲吳楚閩越之衝地左軍山右洞庭
北宮亭險可恃也則亦人所必爭進邑全省庇也可弗周於
庇進哉猗歟聶侯其以固吾圉也其以字吾民也邑城而既
敝矣修築經費弗貲使徯目前而弗爲圖是日中不彗也抑
責之旦夕急就焉是極重之賦不能蠲而土功箕斂益困之
毋乃反裘負薪之譏乎侯涖治三載日思所以庇吾民也所
見無非城者於是節衣縮食計薪俸羨積若干計金矢夙儲
若干月計不足歲計有餘爰於乙巳之春肇修焉范土而陶
縮版而築騎危城而蓋守望之屋拓城址而禱之甃石焉廣
度以軌役力而償之不病農飭材而購之不病工湮者以明

俯者以亢城上可以旋駟清堦夫之餽餼擊柝者營室建而
畢工東壁中而考成侯建中權之鼓耀旌旗以震疊江湖之
輕心者惟我進之士若民則知有城之庇而不知有役也聶
侯亶稱厥職哉維時各上臺明威久樹風聲淵思夙圖桑土
故聶侯得受成而上其功云國功曰功民功曰庸功久曰閱
誼當勒之貞石以志勿翦至司諭廬陵曾君翰邑丞贊皇安
君克純典史馮錫祿巡司茅汝明沈文衡邵可成皆効力馨
鼓劄得並書侯名當世順治戊戌進士銘曰爍進賢兮天光
臨官兮邑兮庇吾民鍾在陵殷殷兮鼓在塘勿亟蛟鼉惕伏
兮江湖謐泰無虞兮師貞吉歌蔽芾兮罔攸射

乾隆癸亥羅荃修城記進賢縣城週迴一千七十丈爲雉堞者一千七百七十有奇爲城門樓者七初僅土城明嘉靖始發以磚至萬曆三十六年水城傾一百餘丈周令光祖重修已非金墉之固矣鼎革時兵燹疊更傾頽實甚

國朝康熙三年聶侯當世加增堞口修葺城樓而八九十年來土墮磚糜城身日敝特樓堞蕩然且千蹊萬徑無復關闔乾隆八年癸亥梁南姚侯來蒞吾邑顧而憂之亟請上憲大加興修既報可且委員度土工焉於是估計給帑一萬零四百兩刻期興工侯曰不一勞不可以永逸爰鑿石於山陶埴於野購堊於鄰邑募力於無業之民盡撤其舊而更新之

引溝築基填以堅礪城東水門建丹鳳青龍二橋爲城之趾自趾至腰以石上身以磚表裏畫然毫髮無差中實三灰七土築之登登削屢馮馮計高一丈加堞五尺堞用方石覆其頂如笠如屋奕世不叱城之闔捲甕建巍樓者七翬飛雲表可以察祲祥可以嚴守望可以壯觀瞻大體得而衆善畢臻噫盛矣惟侯廉以克己勤以奉公撤蓋屏輿日行塵坌中與匠作均勞苦口講指畫有如一家面黑膚焦不印自恤宜乎人心鼓舞趨事恐後耳是役也工始於甲子季春竣於乙丑之臘石以方計六萬八千五百有奇磚以枚計七十萬九千九百有奇灰以權計二十六萬七百有奇他如木竹瓦鐵未

易更僕費鏹一萬一千八十六兩零乃功始告成碑誌未立而侯以計典去官矣荃受知於侯爲門下士又目覩締造之艱何敢坐聽淹沒不揣固陋因作斯記且討工實臚諸建置志末俾踵事者得所折衷焉侯諱夢麟號瑞徵雲南臨安府蒙自縣癸卯正科舉人

附城河發源香爐嶺仙壇峯流從城東南新橋入城過大石橋又折而北東從縣左青龍橋出繞城北注青嵐湖

縣冊

鍾陵故城在進賢縣西北漢南昌縣之東境

府志

今有鍾陵市在縣東南昌縣界又有鍾陵鄉故城蓋在今二縣界

府志

官署

縣署枕壇石山宋崇寧三年創建建炎間燬於兵紹興二十六年縣令杜易重建乾道六年縣令張嘉謀建廳堂門廡元至正乙亥復燬於兵丙子尉劉勇重建丁亥縣尹周天祥大德乙巳達魯花赤波羅嘗增葺之至元中縣尹唐玉成建正廳元統中縣尹李世能建後廳達魯花赤夾谷八兒思不花創譙樓至正庚寅達魯花赤袁州瀛翁狎巷其始未幾俱燬丙申縣尹傅箕又新之明洪武中知縣李思中重修永樂中知縣余曜治縣有聲僉憲黃公翰書清正堂旌之天順間吳聘君與弼題其前楣曰清獻之邦正統間知縣張冲復修正德丁卯知縣李思曾以

堂址卑乃撤後堂爲廳事五楹顏其堂曰親民堂嘉靖乙未知縣蘇志臯重葺萬厯癸卯知縣黃汝亨改顏爲保慈堂

國朝康熙十年知縣聶當世建廳一重額曰保赤堂凡川堂東庫房西冊房東西二廊儀門鼓樓俱新葺改觀焉聶志

乾隆三十年知縣孫鐸增修之并鑿壇石山頭建宅門川堂二堂西通舊廡羅志

邑人包衍清正堂記莆田余侯之令進賢馳德政聲僉憲松江黃公翰至邑書清正顏官署之堂以旌其操勸也孟氏曰君子與人爲善僉憲公有焉正己以正人侯其有焉其涖政也不察爲智不煦爲仁不靡而怠不刻而苛懷儉邪者咸結

舌舞巧智者莫厠足行苞苴者讒佞者弗敢爲先容修黷宮成文昌樓爲教化之地崇禮師儒誘掖俊彥善作興焉廨署館傳壇墀祠宇戮力完治至於己之私室無一增飾安固陋而已處察案和而不同待羣吏權由己出治獄訟以善諭弗文致改而止有頑弗率德糾羣肆譏者竄殛無遺類民風一革及遇水旱若已傷必竭誠禋禱饑饉則勸率賑貸民德之稅賦積兌董之有方國用所需刻期畢備藩郡才之夫水固自清也泥濘之流始濁表固自正也拜屈之影始枉書曰清明在躬語曰政者正也侯有修己正人之道故僉憲公名侯之堂曰清正也史記豐稷之清如水楊震之四知皆特書表

進賢縣志 卷三 官署
之後之衆善兼美一介獨持維清則正維正益清難矣哉
邑人萬鏜親民堂記凡官府之制以廳事爲重蓋臨下出政
於此宅中以運四隅也厥惟高明乃宜吾邑廳事建立已久
厥址庳夷與旁廡等而廳後爲退居地勢穹然顧相陵壓失
所重而乖於制莫之或省也宏治壬戌冬茂名李公學曾以
進士來宰吾邑視事之初卽圖改作而物力未裕規畫以需
乙丑秋乃撤退居之故宇因高爽之成基畚楛稍施方平若
一卽其所作廳事焉凡五楹其廣六尋有半深視廣三之二
而差縮焉崇視深二之一而加羸焉前則敞其庭以納陽光
後則壁其中楹以供宴坐而舊廳則仍存之以爲羣下候直

之所由庭而升廳事高計之爲尺者三由舊廳而升於庭尺
如之加寸者五厯以階甃以石役不踰時聳然改觀公日率
屬臨止步位峻整體統尊嚴規模崇顯耳目發舒會於心達
於其政所得者多矣閱三載正德戊辰公被召爲刑科給事
先是宰邑者多敗於官卽有轉遷罔克如意堪輿家謂廳事
庳壓所致及是而公始膺顯擢抑地靈之應有所助歟此固
不必深論要之脫卑近而宅高明君子爲政自爾也後三十
年嘉靖乙未乃今蘇侯涖任之歲顧瞻茲廳久而寢敝恐前
規之就廢也爰加整葺祓飾一新旣而曰嗣其事不著其始
享其居不知其人可乎乃追李公作廳始末屬記於予予昔

備員邑庠荷公之遇甚厚每欲祠公於名宦而未果也睠茲遺績固樂書之況重以侯之請耶侯名志臯固安人壬辰進士更賢治劇來自瀏陽舉廢修墜此一端耳乃廳甫修而臺諫之徵適至亦其會也并書之

邑人饒宇弼保赤堂記鍾陵據會省之東取道浙閩者類信宿然後去故治象盛衰純疵常爲四方觀瞻取法治故有堂浸燬於兵踵事者乃析民居新之柱礎門屏取具而已非能高明光大以有以壯望邑之觀也玉沙聶侯以名甲第來令吾邑凡事之有待於新者無不畢新新學宮矣又飭城垣新倉廩矣又建伍相國廟修羅溪矣又修郊圻之橋梁進固瘠土

俟休養生息舉公事之宜新宜飭者朝發而夕告成事乃顧瞻茲堂仍猶舊貫非所以作民敬而告以居官之未可假易也於是以前年某月庀材命工不旋踵而堂成取材自公民不知役然後知侯之所以安位者勤愛民者仁而報

君者大也蓋上所示於下者莫如體而下所貢於上者莫如情若夫其體不崇其志不肅其情亦必不出也夫上所以治下與下所以受治者率以爲分耳以爲分則惟我所命尊嚴則尊嚴之苟簡而亦無不尊嚴之亦安所見民違順於其間哉而黠者則有以窺之矣反覆隱藏卽嚴刑峻罰而情不出蓋不情生於不敬不敬生於不肅居卑隘之堂而希隆盛之

理上所求於下者略下所報於上者微治固然也侯精明博
大事不可已必求安好而後止類如斯堂然則斯堂也以爲
大令布德行惠之所而卽億萬姓望恩希澤喁喁待命之所
以爲大令曲直得情之所而卽窮簷婦子顛連觸目之所登
斯堂者安得不瞿然深思惕然遠覽哉侯仁政多端美不勝
書於斯堂顏之曰保赤又署之曰居敬是可以報
君是可以安位侯之意於是倜倜乎其遠且大矣侯撫吾邑
者十稔旦夕內召余體侯之意備書之以告後之官斯堂者
聶侯諱當世號二瞻湖廣監利縣人順治戊戌進士
知縣廡在堂西北共三進翼以左右廂

龍亭庫在廳事左

戒石亭甬路中

土地祠儀門內左偏

吏舍廳堦左右東承發號吏戶禮房西兵刑工房

監獄儀門內右偏康熙間改設儀門外右偏

鼓樓儀門外

幕廳廳事左今廢

軍器庫架閣庫俱在廳事右今廢

賓館儀門外左偏今廢

旌善亭申明亭俱洪武中立縣署西知縣張裕改列縣門東西
後知縣梁璧又立亭各鄉都共四十所今俱廢

以上聶志

按舊志載縣署有慶蓮堂清陰樓景魏亭望雲亭俱宋乾

道間縣令張嘉謀所建安樂堂元至正間達魯花赤袁州海牙所建壽萱堂洪武間知縣徐成美顏於後堂復易爲自如軒嘉靖間知縣曾挺改顏曰寓諫軒萬曆間知縣黃汝亨改顏曰嘯軒嘉禾堂則嘉靖間知縣蘇志臯顏於後廳觀物亭知縣趙理建喜雨堂則正德間知縣姚永植創于廳北桂花亭則黃汝亨建端蓮亭天啟間知縣梁應材建今俱廢

邑人萬鏜寓諫軒記縣治廳事之後旁出達右直令廨之前餘地二三丈許有軒翼然於其間廣不及尋者寸深不及廣者尺高視深加三其一焉軒故名自如在廳後之左地迂且僻曠漠之居日漸荒圯邑侯筆山曾先生旣蒞政五閱月念退食之靡居而茲軒之間置也乃撤而移之材用舊而當羸工未旬而告訖亦誠簡樸矣哉一日太守常濱何君過予言曰筆山之軒成矣方擬所以扁之予曰云何常濱三數舉焉而予未之應也常濱曰君意竟如何予曰筆山非諫官乎而屈致吾邑非緣直諫乎則茲軒也乃其寄寓焉耳扁以寓諫不亦可乎旣而筆山聞之曰扁出於治齋則可吾固不可常濱復以語予予爲書其扁而復申其義曰人生天地間皆寓也順逆得失之境倚伏於後先而推遷於左右者寧有常邪衆人交蔽故不勝其避就之私惟安於所值而無所容心焉

此君子處寓之道也筆山其見之素矣今也卽軒之所在而身寓焉卽身之所寓而心安焉時乎寓也或整襟而危坐或隱几而深思或啟窻而舒眸或巡簷而散步或對客於此議論而咨詢當斯時也瘡痍之念不有軫切於閭閻者乎芹曝之忱不有馳戀於魏闕者乎朱墨之斟裁不有默運於案牘者乎仰前修之芳躅俯來世之嚴評不有奮然而興惕然而省者乎筆山久歷兩垣多所建白未暇悉陳頃因大駕南巡三上封事尤爲天下之所傳誦予嘗得其疏草而竊評之忠誠懇至有折檻引裾之風詞旨明婉有納約自牖之義識宏達而事皆可行有濟川作霖之用時倥偬而文如宿構有倚馬揮毫之能直道難容高才見忌炎荒之謫固弗免矣雖然天生英傑豈無意乎將降大任此乃爲之地耳蓋動忍之益一則德日崇焉盤錯之經則業日廣焉閱歷之助鬱遏之鳴則文日昌焉古所謂立德立功立言將在是矣筆山持此三者足以不朽矣然則茲軒之所寓祇諫耶亦有進於諫者耶果寓邪抑有久於寓者耶寓也者暫時之迹也久也者不朽之名也而軒也者暫之所卽而久之所基也吾又聞昔賢所歷之處一草一木一椽一瓦人皆慕而傳之茲軒因筆山之寓而傳播益遠則茲寓也實軒之幸也已而鏗也亦以狂慙忤時久安放棄有懷耿耿藉此一鳴後之人或因其文而比數

進賢縣志 卷三
之曰是氣味相似者庶托以不朽乎則斯記也又鐘之幸也已

儒學署詳學校

縣丞署在縣堂東側宋乾道壬辰張挺新之元季兵燬縣志

國朝乾隆四十二年縣丞王世鈞借廉新葺府志

典史署舊在縣治南淳熙間尉黃汝嘉作三賢堂於廳西以祀

梅福魏徵士臧嘉猷卽今學基後改建縣治西南簿廳前縣志

國朝乾隆三十四年典史朱士任借廉修理府志

梅莊巡檢署在縣東北六十里雷家莊卽卽子巡檢乾隆三十

年改兼管潤陂巡檢移駐梅莊府志

潤陂巡檢司縣治東八十里明洪武初立 卽子巡檢司縣治

東北一百二十里明洪武初改卽子立寨 龍山巡檢司縣治

北一百里明正統初立 花園巡檢司縣治東南四十里嘉靖

末年以平花園盜立縣志 以上四巡司今俱裁

按縣舊有土坊巡司饒坊巡司明初裁縣志

主簿署縣署西側今廢縣志

卽子驛在縣東北一百二十里巡司署右康熙三年裁縣志
府志同

按縣舊有澁塘驛菱塘驛羅溪驛土坊驛俱明初裁又邑內

原設馬驛亦廢基卽今城隍廟縣志

河泊所在卽子口縣志 今裁

城守營舊無署乾隆丁亥知縣孫鐸購城西何姓別業建見乾隆丙戌遷武廟記

陰陽學舊在城隍廟側知縣周光祖改建文節祠左

醫學舊在鼓樓前知縣周光祖改建文節祠右

僧會司在海智寺 道會司在崇真觀 以上聶志

按縣舊有監酒稅廳在邑治酒務在邑東南稅果局舊在霧

嶺義井東正統十二年知縣張冲改于南昌道左旋撤聶志

公所

萬壽宮嘉慶十五建在西壇康王廟右今尙未訖功 採訪冊

萬壽亭乾隆三十五年知縣李升庸建於海智寺後 羅志

考棚在縣治東南其基地東至曲水書院西至齊姓屋南至港北至港係黃敬業黃金鐸黃梅黃聖奏黃孔箕勸族公捐嘉慶二十一年廩生萬叔權建大門內旁屋兩間二門內小屋兩間東西坐號可容千餘人正堂一間旁房兩間東西倉兩間小屋兩間其後尙有餘址 採訪冊

新建進賢考棚記南昌府治之東偏百二十里有縣曰進賢

縣鄰撫饒二郡前臨三臺山旁列香爐仙鶴雙乳諸峯下瞰

常湖九曲環繞城郭唐宋以來名賢踵出迄前明舒公芬陳

公棟

國朝傅公宏烈尤以鼎甲科名文章氣節彪炳史冊地靈人

傑洵不誣已縣故無考棚乾隆戊辰向知縣德一因傳宮保府舊址改立曲水書院每歲科縣試童生羣萃於是顧歷歲既久屋舍多傾圯且人數歲增湫隘不能容當事屢籌移置他所率不果嘉慶丙子庠生黃敬業監生黃金鐸闔族人等於書院西邊捐地一區廩生萬叔權庠生萬達權監生經權兄弟獨任其資刵建考棚棟宇翼然分列入進前後坐號計容千二百餘人庠生張文賓襄其工經始於丙子春二月竣事於冬十月以七千緡有奇其踴躍急公而爲是役也亦可謂好義之士矣葺工之後丁卯年周知州澍具文來請予志其緣起年月勒石以昭示永久周知州予昔督學浙江所取

士也二十一年元撫江西時檄其攝縣事於進賢有賢聲又率紳士成此事是以元于公案中批此事曰紳士尚義官亦得民心是以成此善舉均堪嘉獎蓋知其必能葺工也太子少保兵部尚書都察院右都御史總督兩廣前江西巡撫揚州阮元撰記江西南昌府義寧州前署進賢縣事錢塘周澍敬書江西南昌府進賢縣知縣宛平鈕士元勒石

南昌道在縣治西仁行坊永樂間知縣李思中併三皇廟醫學爲之規制勝他署後爲兩臺駐節所明末燬於兵

國朝康熙三年知縣聶當世捐造廳事後堂二重儀門二門廊

房庖廡悉如制

聶志

今廢

羅志

當世自撰修建南昌道館記康熙三年歲在闕逢執徐而予治之南昌道落成因故址而構之從舊貫也一日卽察院云客有問余者曰是役也亦勞矣哉烏在其不可緩乎余曰不可緩進近承省轄其衢爲四通五達憲節每於此畱芟棠焉不則監司暨郡州縣牧率假道至前此二司及府館蓋不啻三四設而後俱蕩爲榛莽也上臺重客過臨勢僦民舍爲館具民則不願又體統不肅昔晉以隸人之垣羸諸侯子產猶有辭矧末員之無以共命且拂民意也屬在守土者何是誠不可緩客曰進固赤窶瓦礫猶在目飛鴻未全集也此不貲之費安出乎余曰是則早計及此矣自予止車時此羸者氓

賦役之不登獄訟之未盡衰止黃鳥碩鼠交訶乎國中撫綏且不暇忍以土木滋之擾乎爰殫衷區畫捐俸餘爲大事始會邑馬生以屋二重榜受直者約平其價可八十金得瓦料若干以濟工役力計日給餼不爨鼓而事集蓋義取乎節不費公帑無煩民間一銖也客又曰是則然然則前此令是邑者何以無舉乎余曰天下事惟底厥成爲難又非成爲難也慮始更難夫固有好道風雅名爲慕潔而實圖自便者固有傳舍其官汶汶不終日者不知勤公家之役而爲百姓建久遠非特動之爲擾也動之而民愈安非特靜之爲安也靜之而適以滋擾也者誠得其要而理之若網在綱有條而不紊

通賢縣志 卷三
若農服田力穡乃亦有秋安上全下道無越於此而又安可
至予而不任其責也夫客乃起而謝曰誠如此言遂紀其始
末鑿諸石是役也爲門二各三楹爲廳爲堂各五楹爲軒爲
室各如其楹之數爲廊爲書吏舍爲庖廡悉備具大略軒靚
爽塏不減於昔云

按察分司在南昌道西社稷壇右嘉靖間知縣程光甸建

聶志

今廢

羅志

布政分司正統間建於來撫門內城隍廟右萬曆間知縣黃汝
亨改建於社稷壇與按察分司並顏其堂曰紫薇署後有此君

軒

聶志

今廢 羅志

黃汝亨自撰紫薇署記鍾陵當五路衝車轍馬蹄日夜不停
而東西兩門爲甚文明次之田洽又次之惟城南門稍折而
僻則邑城隍廟貌在焉廟右故設布政司臨駐所車馬過者
稱不便卽曳之弗前歲久日就圯前令更爲鍾陵書院諸生
抱文擔書過者亦絕少堂皇廊舍垣壁俱朽敗欲墮屋幾爲
墟當客鱗集或御史臺按部藩臬諸侯伯郡州縣牧擊轂至
則又苦無以爲館舍往往問之民間民蹙額以應計更創之
費不貲時詘不可以有舉不敢以請計莫若以是司敗屋料
存十之一移置它所是空基地官爲市之城南民得其價可
易土木石諸工匠費於是居民何姓者出金四十有七兩

請爲合族饗食處稍備工十之三會省兌倉成縣故有水次
三陽潤安諸廢倉木植磚瓦可移以相佐則又得十之二而
豪民有輕犯法罪溢束矢者更令出穀贖得四十金羨則又
備十之二不足則以報鍰金餘者益之而工成矣于是更顏
其門曰紫薇署從城西門入折而右居舊院左今亦更其顏
曰觀察臺兩相翼而臨焉是署也爲門者二翼以兩廊爲堂
爲廳爲軒爲室爲書吏舍爲廚爲廁具備無煩官帑無騷驛
民間越三月事竣而宏敞堅淨勝它館上官重客過臨者令
亦得率諸僕馬折腰從事無兩馳不可以無記

南昌府館初建縣門左正德間知縣劉源清移縣治西

聶志

今

廢

羅志

紫薇分署在縣治北拱極門內萬厯間知縣王亮改建

聶志

今

廢

羅志

花園公館在縣東南四十里 徐橋公館在縣東四十里

池溪公館在縣東北三十五里卽翁嶺鋪 濶陂公館在縣東

北八十里 藍田公館在縣西南二十五里 玉嶺公館在縣

西四十里

聶志

以上六公館今俱廢

羅志

養濟院洪武間立舊在縣治西北二里外成化間知縣林貴改
烏石山西倉基爲之苦狹隘知縣陳延又改鄭家塘舊社學爲
之卽今所萬厯間知縣黃汝亨重修題曰先四民明季燬於兵

國朝康熙初年知縣聶當世重建仍舊名

聶志

道光二年知縣

朱楣重修

採訪冊

育嬰堂二所一在縣治前狀元坊左大巷內道光二年邑人周仕燦捐一在縣治右少府橋西馬家巷內道光二年邑人公置採訪冊

新建育嬰堂記

國家肇造一百八十餘載丕旨怙育氣煦形嫗湛恩龐鴻洋溢方宇遠方大吏郡守縣令罔不宣

上德意撫字勤懇恤耄存孤各有攸處羣生嗶嗶咸得其所嘉慶庚辰歲安徽涇縣朱君作令進賢訪風俗詢利病以是

邑之向無育嬰堂也深慮一物不育以爲己憂查前任縣令周君澍捐銀五百兩邑人夏忠捐田一十五畝而建堂收育經費不給迺謀之邑人邑人好義踴躍爭輸於是置縣署前宅一所購縣署西少府橋側民宅一所以其金置田若干畝建堂籌費規制咸備而猶慮縣村懸隔領報維艱窮鄉僻壤或有遺漏不可不立長久無弊之法以善其後也時邑之羅溪有廩膳生周廷芝者與族叔維禧設育嬰之法行之一村其法捐穀出息有貧不能存者生女時給一石養至三月八月如之以三石爲率至一歲時或畱自育或給他人者聽有收撫他人初生之女爲子婦者亦贍以穀行之二十餘年全

進賢縣志 卷三
活一百三十餘口朱君以爲善下其法於各都分租穀爲三十九分每都選舉忠信者二人領穀就近收養歲終報其數於縣按其多寡以爲獎勵如此本之以實心行之以實政吾見邑之呱呱而啼啞啞而笑者無不各遂其咸若之天也夫國家德洋恩溥鰥寡孤獨廢疾者有養旣行之以其仁按律有生女溺死者照故殺子孫例復讐之以其義仁至義盡蓋惠養斯民如此其詳且備也而愚民或昧利忘義自殘骨肉是而可忍孰不可忍惟良有司以保抱攜持之意行之於上都人士以分災恤患之心承之於下不獨親其親不獨子其子此大道之行而天下爲公之世也豈不懿哉翰林院編修

兼撰文 國史館纂修 記名御史賀熙齡撰

進賢縣志卷四

建置 倉廩

常平倉五處

一大堂西廊倉計廩五間

一二門內西倉計廩八間

一早塘倉計廩二十六間

一義學倉在忠毅祠側計廩十二間

以上四處乾隆二十二年知縣張若翼詳請修理

一西門內倉計廩十二間

此倉乾隆十三年知縣向德一請動用捐監倉費銀兩建造

以上五倉共貯額穀貳萬肆百叁石肆斗捌升肆合柒勺以上羅志
舊社倉三十六處

三十六倉俱萬厯間令黃汝亨建其實粟之法首捐贖次勸義民小訟願息輸石斗者聽每年擇忠實里保二人董其事官置簿三扇一付見役一付役過一存縣縣官按簿稽查或時不意親臨之無差官查盤之擾春夏交出貸小民徵息加二遇歉歲則徵本暫免息水旱甚設法施賑先本社次外鄉又於本社擇一人看守每年給勞穀四石頗稱善政然未行數年輒廢也聶志

金廷璧社倉議曰古常平義倉豐時積之無賤價傷農之患歉時散之無閉廩騰價之憂誠爲千古良法進舊設五倉在邑曰常豐在鄉有東西南北四倉環一縣之民待命焉然鄉市遼隔遠邇偏枯勢所必至後總實于常豐一遇水旱移粟則轉委假手因緣爲奸移民則民從百十里外忍饑裹糧而至竟日不得一粟而市井吏胥詭屯插和反充若輩橐此已事之明鑒也令黃公汝亨熟悉茲弊除常豐倉邑社倉外復立各鄉都倉三十三所夫亦曰以本處粟濟本處民以各都人辦各都事而官第爲核其數當青黃不接耕耨無資時小民不苦稱貸富兒亦不得閉羅橫索焉乃行之不數年輒廢者

有治人無治法自古記之舉而行之無不望于當事者
舊社倉一十七處

城內社倉一間在常平倉側 一都二都三都四都倉四間
在錦繡坊 五都六都七都倉三間在鎮頭嶺 上八都下
八都倉二間在七里岡 九都二十六都倉二間在趙家鋪
十都十一都十二都倉三間在陂頭村 十三四都十五
都倉二間在鯉潭所 十六都倉一間在南臺集 十七都
十八都二十二都上倉三間在鍾陵集 二十二都下倉一
間在鹿塘村 二十三都倉一間在梅莊集 二十四五都
倉一間在莊上村 二十七都二十八都二十九都倉三間
在白鶴山 三十都三十一二都倉二間在黃坊村 三十
三都三十四都倉二間在羅溪集 三十五都三十六都三
十七都倉三間在玉嶺 三十八都倉一間在朱坊村以上
羅志
各倉久廢採訪冊

以上十七倉係乾隆七年巡撫陳宏謀奏請各州縣廣建
社倉其本穀卽于該地方常平倉內酌借俟收息穀贏餘
照舊歸款進賢縣原本穀六百九十九石六斗是年詳請
常平倉動穀一千四百石四斗添撥社倉以作本穀二共
本穀二千一百石至乾隆九年歸還常平倉穀一千四百
石四斗息穀存留各都作本乾隆三十二年奉文建設社

倉變賣息穀九百六十四石二斗六升三合五勺乾隆四十五年奉文變賣社倉息穀九千二百七十石五斗七升五合解司充公尚存本穀三千六百一十一石四斗八升九合九勺乃日久弊生彼此挪移前後虧缺以致空虛社正徒抱空籍莫可如何有司歲取具文上下相遁又每歲檄變息穀閭里騷然傾家蕩產指誣善良僅僅完案今此穀無存已三十餘年朱子所云聚可食之物于鄉井荒閒之處而主之不以任職之吏馭之不以徒流之刑苟非得聰明仁愛之人又得忠信明察之士相與并心一力以謹其出納而杜其奸欺則其法之難守不待已日而見者也

水次漕倉在省城進賢門外廩屋五十四間

府志

明萬曆二十

六年知縣黃汝亨建

縣志

邑人樊兆程記我國家歲漕百萬之粟以實邊儲計卒食腳運之耗不啻三致一也再計水衡金錢之費不啻十致一也若析計郡邑頭會箕斂種種費出無經不啻二十致一也夫軍國有必藉之需民力有一定之額浮於額之外者何益於國祇重病吾民耳以吾歷覩東南郡邑漕粟之額外病民者比比皆然但有甚不甚焉我進邑之漕粟踰額叢蠹敝也甚矣進邑與南新均錯壤而治南新儲漕粟以庾進邑諸漕粟以舟儲以庾者粟之數可核粟之顛勿壞粟之輸甚便粟之

出納無敢高下其手儲以舟者粟以無防而耗粟以近水而潤粟以色不稱而起旗軍之刁難粟以船蕩漾而致稱量之不平又其甚者有風波之險有守候之苦有盤剝之需勢不得不僉富有力者領兌名曰解頭里遞任徵解頭任兌三十八都各一人焉彼在夙猾則藉名目肆科索若村保愿民畏旗卒如虎視赴兌若赴戍賣屋賣田賠冗費惟以得蚤脫苦役爲快勢又不得不雇巨艦艦頭倍索募資肆行侵漁更因緣旗軍強半分利解頭莫敢誰何大率計每年浥耗外交兌諸浪費及搪量高下其手者船頭公取竊取一切無名莫算者銀不下二千兩有奇米不下二三萬斛而嚮所立縣鎮三

倉頰擾疊累及衙役市僧以爲奇貨而吞食之者又不可數計也會一邑額米二萬六千有奇而額外浮冗之費幾半之鍾陵編戶厯三萬四千耳貧而赤立者什之八九有中人產者什之二三其富有力者百不四五也每歲傾三十八戶而幫運津貼者又不啻數十戶歲計傾害者村相望無一歲而不漕則無一歲而不害民安得不十室九空轉徙相仍也哉前令恤其事或有議賃倉囤兌者或有請移船就鄔子交兌者竟格而難行今我武林黃令君以己亥來蒞我邑孜孜詢民間疾苦次第具白於當道尤於漕運一事進父老訪縉紳羣子弟而備詢之咸以狀聞謂必有倉儲而後可甦民累也

令公曰烏可緩時庚子六月天溽暑令公不避星馳抵水次擇便利得庾部之石有故叅戎第修梁傑構堅礮崇墉向東而西縱一百七十尺而橫半其縱之數買直比創費省十之六衆咸曰便於是召集闔邑鄉遂坊市之民計材慮役萬姓謹呼挾銖兩祈成事思得廉幹者任之敦請余族兄州牧灼董其役分而佐理者八人若古昔重三老之義媿媿爲民請於上臺咸報曰可卜日鳩工庶民子來澆者易之頽者築之卽舊爲倉者二十三間創新爲倉者六十一間每都各一倉以便收兌廳事之左量畱翼室庖廚等房以便糧衙居憩且可省先年解役賃屋重費也凡用木七千六百章瓦甃黝堊鐵石之用稱是計費九百兩有奇經始萬曆二十八年七月越三月工完而運艘鱗鱗至矣值歲當羣吏入計令公且行且倦倦調停一切事宜與我民約曰革去倍徵之議桶一以官斛爲準毋重困我民爲也里遞各催米隨便抵水次上倉卽返毋久守候爲也批頭於鄉隅中選僉十二名守兌各里遞量爲幫貼毋仍先年疊累爲也又言之上官曰改水兌爲倉兌則移船贏米請減以抵脚費也解頭旣革民無煩役旗軍亦輪伍接單請毋以什五之衆重擾擾也時制臺仁吾夏公太府常鶚陳公咸雅志爲地方興除得悉遂所請地官尚書卽如愚俞君監督兌政持廉釐弊軍無敢譁民咸稱便我

邑倉兌創始尤藉彈壓均劑之力居多民相與尸祝之以識
不忘是歲無插換無浥爛散酒至於無籌淋尖樣米畫會
頭舵夙例諸無名費槩多減約令公以辛丑夏月復任鍾陵
悉心嚴覈有餘米有剩費計是歲汰省比先年濫溢者不啻
什百一一申白之著爲例我邑利賴寧有旣耶邑人慨公之
澤思勒鴻休垂永遠相率請記於程予惟弊不太甚無容速
去法不稱便難以強民我邑數百年水兌荼瘁甚病吾民莫
不以立倉爲便令君斷然行之剔苛除煩而民不以爲驟舉
羸役衆而民不以爲勞惟時丁壯安於田里耄倪歌於道路
且也令君任邑甫二載其更生我民率多異政日者南兌之
節縮厝置視漕兌所省舉相半也鍾陵何幸而獲逢令君也
哉昔呂文靖不稅農桑一事耳王文正公且謂其能重民事
達治體而知其必與沂公並相我令君諸凡擘畫靡不便民
識體而不爲旦夕計也者其他日鴻巨事業洵可必也矣余
願與士民拭目俟之令君名汝亨字貞父號寓庸浙江仁和人
戊戌進士

附漕兌議

進賢省倉作者苦心良法鉅細畢當十數年而後寢非其初
殆有政息人亡之感焉爰備述當年文移條議以存故實

蘇志

南昌府進賢縣爲懇恩俯順民情比例省縣議立兌淮官倉

以蘇極困垂永利事萬曆二十八年五月二十二日據通縣坊里王家讓何邦謐等連名具呈前事內稱進賢土壤接近南新制產同種輸運同道惟南新有倉兌之利獨進賢遭船兌之害每年起運之時值冬乾水涸積年大船戶包寫船隻駐樊西港三陽等處長短小船駕路逆流盤運看守不全恣意偷盜插和穀碎等齊衆米停畱日久濕潤漸生錮弊難革更有風波之險糶粒難存臨兌掛籌動被旗軍刁難卒難措辦只得重利揭債認賠傾家蕩產十解九乏苦已極矣今衆自備民財買地建倉革除大船而濕潤插和故弊可除懇乞申文等情到縣本年六月初八日又據本縣鄉宦樊兆程雷

夢麟江和饒位徐應鶴陳維春等舉人黃誥何允清等廩增附生員徐學詩舒一桂等具呈前事內稱本縣民以瘠土困踣病加兌役疲斃山城非澤國之區冬月淅流如綫長江離水道之遠運米梯航難通必假小中船兩遞而至巨艘故遭大船戶百弊而恣侵漁不惟風波之險驚心疲役取困水穀之插藉口旗軍小民業痛口食脚耗之艱上運何堪掛籌逋負之苦鬻兒賣女蕩產傾家若不絕去其弊源何由頓起溝壑惟南新設有兌倉軍民安堵獨進賢原未創建耗損無休幸遇睿慮國計軫念民艱乞允建倉之議以刷宿垢冀申宜民之策大鬯仁風則倉自民創歲省妄費數千金米不船兌

利益疲民千百世等情本年七月初二日覆據通縣坊里王家讓何邦謐等呈乞申文建倉兌草船運急解民懸事內稱本縣糧解年換船戶積慣欲自看守難防盜竊只得包裝恣意插和緣因假手隔目事不由已致使軍旗刁勒有名倉兌一立舊弊悉蠲前月泣訴天臺蒙恩允情衆等自備民財買地建倉見有南昌居民熊偉置有水次便倉一所愿賣貯兌憑衆定價議買卽今兌運在邇讓等勢急湯火愿各損貲速成救痛呈乞速申建倉草船裕國蘇民等情到縣據此看得通縣坊里王家讓等鄉宦樊兆程等及通學生員徐學詩等再三呈懇所據卑職識淺未敷正體力綿無救民艱豈不知

治貴無事法在安民顧有民所自起而順之爲安事在樂成而動之爲靜不憚一勞而貽永逸則今日之水次倉兌是已竊照進邑東南皆山瘠之土西北多水潦之鄉疊賦繁差編多派重已不堪命而淮兌之苦尤不忍言緣無水次官倉以致雇船搬運故每年有解頭賠累之困有里遞轉運之煩有小船大船搬移虧折之苦有旗軍藉口船裝濕潤刁尅之害是南新立有便民官倉不僉解頭者約每年多費米以三五千石計銀以千餘兩計而至於民間之計脫解頭里遞之嚇詐人戶積年保歇船戶通同包攬科派之費更不可算俱由一倉不立百害叢加富至罄竭貧至流亡年復一年困之又

困而率悠悠歲月未遑議成者固非官不恤民亦非民不擇便緣時未極敝則隱忍莫言地無便倉則工費爲鉅民難慮始事且因仍今據鄉宦樊兆程等里坊耆民王家讓胡尚義等呈稱前事極訴無倉船兌之積苦與見有南昌縣民熊偉契賣自置住居便倉一所在於本省交兌水次用價見買不過七、百、金、而、整、舊、加、新、營、度、之、費、不、過、三、四、百、金、計、闔、邑、照、米、派、出、者、不、過、千、金、而、所、省、銀、米、三、四、千、有、奇、目、今、所、費、者、僅、抵、一、歲、之、半、而、每、歲、之、享、利、蠲、害、不、啻、億、萬、之、多、誠、爲、一、勞、永、逸、進、民、萬、口、之、便、卑、職、猶、恐、迹、涉、紛、更、顧、慮、首、尾、召、集、父、老、商、兌、不、寧、而、合、邑、都、圖、坊、里、之、民、富、者、挾、銖、兩、貧、者、持、分、釐、謹、呼、同、聲、風、湧、雲、集、倉、費、倉、價、移、時、而、成、此、非、卑、職、眞、有、憫、恤、之、實、能、致、其、子、來、亦、由、進、民、不、堪、湯、火、之、中、自、救、其、頭、目、卑、職、猶、尚、狐、疑、不、決、稍、待、歲、時、顧、念、目、今、淮、兌、不、遠、萬、民、輸、赴、已、同、若、違、時、失、衆、後、聚、爲、難、邀、簡、靜、無、事、之、名、造、棄、利、貽、害、之、罪、又、不、忍、爲、然、情、自、下、通、恩、由、上、造、非、職、一、人、所、敢、擅、便、又、查、得、南、昌、新、建、奉、新、三、縣、見、蒙、兩、院、司、道、允、行、倉、兌、事、例、萬、姓、銜、恩、進、之、赤、子、諒、蒙、一、體、同、恤、爲、此、不、避、賤、愚、謹、將、本、縣、船、兌、耗、費、若、干、與、設、立、官、倉、交、兌、省、費、若、干、及、見、買、屋、整、造、若、干、逐、款、開、列、伏、乞、俯、賜、照、察、施、行、撫、院、夏、按、院、喬、糧、道、沈、各、批、允、

南昌府進賢縣爲申明倉規益民省費懇批定則以便世守
事竊照往昔水兌使費浩繁會近千金本縣軫念民瘼已經
申請條議免僉解頭以省浩費建立官倉以便交納各款緣
由于萬曆二十八年七月十五日通詳兩院司道外卷查隨
奉撫院夏批據本縣申同前事奉批建倉交兌便民居多仰
行該縣照議舉行繳奉此又奉按院喬批據本縣請同前事
奉批倉兌既便於船兌卽如議建造運兌繳奉此該本縣遵
照批示遵行外所有建倉兌過省費銀米數目并遵行事宜
該本縣剔心詳查立倉交兌事務較之往昔水兌軍旗藉口
淫濶議單外有灑倉漿米無籌之索大船戶有口食潑撒之

需每兌米則一石外增補解頭費米一斗今始倉兌亦難盡
除故本縣議處每米一石止酌米六升以備免費緣因原經
申請移船米二升行槩多米四合改抵入倉出倉夫脚之米
致蒙糧道牌行建昌府蕭通判同運糧蕭把總會議已經復
申批行准改詎意刁軍弊聳矛盾前後文移是以二升四合
之米未蒙允除則於本縣酌米六升之內又被旗軍措去移
船及無籌等米是旗軍兩獲其利經解疊受其虧請爲原其
履歷再造鴻庥憫痛進邑疲民大普陽春化育詳查本縣原
經申請移船改抵脚費之米乞賜允行庶民無外增之耗俾
羣黎沾其全惠而鈞臺造福生靈利及萬民矣及查往昔解

頭用大船載米水兌則有大船錢及旗軍雜用使費每石總會五分動以千計蒙允建倉兌簡僉批頭十二人則免解頭四十餘名蠲除百費每兌一石今只用公費銀一分此以內軍旗之兌用糧官批頭之口食遠運之扛解罪贖紙張等項悉皆取足於此此皆中正簡便是宜米有贏餘爲此合行申請報聞懇賜矜憫下情昭布軍民定則使進民世爲遵守則倉兌動有成憲加惠元元其利溥哉所有立倉已行益民省費事宜逐一開列詳報俯賜批示允定倉規今備前由具申伏乞照詳施行

今開

一請省僉解頭定僉批頭以清兌務切照官倉不立勢不得不船運水兌人戶交納里遞催赴解頭中間道里遠近糧米多少不同不得不零星類齊運至本縣三倉收貯委官驗完然後大船運至漳江水次聽兌於是守候之苦風波之險耗折侵蝕之虞上下浩繁之費軍兌刁難之害皆解頭一身肩之故每年值甲人戶聞僉解頭如驅赴湯火富者計資緣以幸免貧者曾不得塗足而收半穗平則互爲幫貼強且恣意科派通縣三萬四千三百二十五戶旣輸米完官又賠米疊役十室九虛無不疾首不貲之費百千無紀若照南新設立官倉則各都圖竟可從便運至倉所糧官驗米交兌而解頭

可無僉重困可立甦矣前件該本縣看得往年僉解頭四十餘名今建立官倉止僉批頭一十二名令其在倉凡經催運米到倉糧官在倉驗收數日本縣印發簿票給與批頭止令查收登記某都某圖經催上倉兌米若干石明白記籍發票給與經催執票赴縣登簿稽查完欠令立倉後苦樂均沾貧富並利豪強無兼併之謀貪暴無多取之害遵蒙允行外乞賜批示永爲遵守

一省船兌浩費切照南新催米一完各雇小船運至水次入倉官驗之後固封候兌何省便也進賢獨雇大船者其所由每年各里遞零星催米各用長短船隻窩路搬運水淺灘乾又必搬剝分駐集樊西三陽等處聽候糧官驗完然後解頭運至漳江水次聽兌夫糧米入倉數各盈幾千勢不得不雇大船守候水次慮有風浪亦不得不雇大船於是積年大船戶包攬侵漁不可勝言每石船銀二分計通縣漕糧二萬五千五百餘石共費雇船銀五百一十餘兩上米之時淋尖插塘口食神福之米約幾二千上米之後插穀換米爬偷撒灑之米約幾二千餘而風濤滯爛之患搬剝之費不與焉則此五百餘兩金二三千石米從何而辦秋毫顆粒盡民膏血也既有官倉以後惟照南新定例各里經催隨便雇船搬運至省上倉卽不能保無搬剝風波而前項船戶額外之費爛濕

進賢縣志 卷四
三
漏偷之虞一切可免矣

一省兌軍繁費切照進賢接壤南新轉輸同道兌米之法漕糧加耗副米與南新之則相同至脚耗米南新止三升進獨三倍此未敢遽請改減惟是倉兌不立往用船兌議有移船就船米每石二升計二萬五千米多至三五百石南新倉兌議單每正副百石只加無籌米一石進賢無倉兌成八十三四石計二萬五千漕糧又多兌米一千五百三十餘石至於積攬船戶通同旗軍久延不兌捏稱濕潤刁難解頭被其指索尚虞殃禍無奈米外加米銀上用銀若上樣米畫會灑倉頭柁諸無名費視南新倍之若倉兌一立船戶不得爲奸旗

軍無所藉口俱照南新例一體交兌前項千七百石米與虛費銀兩俱可減省大半矣前件該本縣看得前項二款原有移船及扒蓋米二升四合已經申請改抵船米未蒙改減請乞詳查原文乞允行縣以便遵守再照往年船戶有淋尖插塘口食神福等米二千爬偷灑撒米二千今倉兌悉已除矣但臨兌又要無籌等費共計二千五百有零爲照往年此多費之米每兌米一石則外加增解頭耗米一斗今本縣區處每經催遞納人戶名下見米一石加米二升四合因以充本年未減旗軍移船之米再照往年每用大船錢銀二分共計五百一十餘兩今建立官倉於通縣經催遞納人戶只照米

每石出銀一分共計銀二百五十餘兩改作公費兌上使用
官給印簿印票發給批頭經催運米到倉照米輸納給票付
經催執赴縣登簿稽考此銀僅足兌軍使費及批頭糧官飯
食之用今建倉兌查照往昔船銀內已省銀二百五十餘兩
釐清夙弊而船戶盡驅插和者何有焉痛削因循而兌米乾
圓濕潤者可免矣乞賜查行永爲遵守

一就倉兌以便交納前件照得先年移船水兌之時民苦守
候軍難勘收南新常年倉兌旗軍例于倉內受米剝運上船
民固無所容其夾雜軍亦無所用其刁難今卑縣有倉已行
照例交兌但縣批頭止十二名倉口窄狹不等軍旗一時領

單輳集不無耽閣紛擾乞牌行該衛所輪五接單逐日挨次
交兌軍止五名頭戴號巾衛所官僉名記之批頭止五名頭
戴糧里頭巾身掛腰牌糧衙官僉名認之照巾識認此外有
多添一人者卽係扛幫害兌之人許軍民稟究夫人少則無
爭單清則米見卽糧里不得以不堪之米交軍旗軍不得以
什伍之衆欺民而于中交搆打點之奸亦無所容矣前項已
經奉行軍民兩便伏乞批示永爲遵守

一每年修倉長便看得兌倉見今親立俱屬堅固寒暑經年
不無損壞合應修葺此項費用不煩別派卽照原派某號倉
房係某都某圖貯米里遞自行修葺如人家自修家倉不待

進賢縣志 卷四
督責自然堅固每年一兌一修輪次加工費亦減省管糧衙官于未交米先逐一看驗有不堅不固希圖後替者卽行查責至於五年十年大加修蓋其餘官廳側房不係貯米之所官自設處加修不涉各糧里人戶若不係兌時間有應修蓋處守倉夫隨時開報以便查驗若守倉人侵損及倉空時容畱衙門閑雜人等入倉作踐究責修補本役革換

一議倉夫工食照得官倉旣立必得守倉夫一名前後早晚嚴行看守歲給工食七兩二錢不必別加編派亦不必重費糧里查得原買官倉外有臨街住屋五間每年賃價銀肆兩捌錢可以抵給不足卽于每年各批頭所領餘費內湊給其倉內所置家伙什物等項一一籍記每年逢兌交割管糧官逐日查驗有遺失損壞者責償若啟閉不謹或於倉米通同經催衙門人等奸侵作弊依律申究以上奉守道王巡道張帶管糧道汪監兌俞按院方撫院夏各批允

南昌府進賢縣爲申請移船米改抵倉兌脚費懇乞批示以蘇民重困事照得軍民一體法貴均平卽如本縣兌糧正額比照南新豐三縣已多脚耗米七升有零此載之令甲不可覲減惟是先年水兌每單正副米七十八石二斗軍船移就民船原議軍內有移船二升內多扒蓋米四合共二升四合在於副米給與旗軍第查南新倉兌每單七十七石緣有出

通賢縣志 卷四
倉入倉挑脚米之費外酌議脚夫米二升剝船米四合此其例之可鏡者且南新連界均一府屬均一倉兌若不及今申請改抵是軍無移船之勞而復收受其米軍獲兩利民有夫脚剝船之費而重出移船之米民受疊累矣合以南新例批示以此二升四合改爲倉兌脚費是旗軍不過省額外之餘糧里免則外之派此皆民沾實恩軍亦貼服具由申詳奉本府帖文奉分守帶管糧道王巡按方巡撫夏監兌魯各批允徵收兌米簡明告示

一兌米除應納正額外向有加增米四升出於納戶名下者已于十甲兌米內盡行革除今見年經催敢有不遵前革仍前需索升合者許指名告究

一每額米一石公費銀一分仍出於各經催名下

一官斛訪得各經催往往俱用私斛本縣已經嚴禁盡行追出送縣當堂毀破無存隨造官斛印烙用厚鐵釘漆布包上有木鐵匠姓名責令十甲經催俱已遵行矣但今見年經催仍執十甲經催原斛送縣親自驗過轉給收米各戶驗實交兌敢仍用私斛圓桶結幫多勒者許被害人執桶首告重究一管糧官常例本縣建倉交兌屢經刊示革除今一甲兌米申委東衙管兌本縣潔已奉公常例分毫不取敢有各經催及本衙人役指稱名色科索各人戶者許諸色人首稟以憑

懲治如訪出一體申究

一批頭本縣照舊僉點十二名責令在倉收兌日用飯食使費俱于公費內動支毫無別用各經催運米到倉除正數米及公費銀外敢有不愛身家刁索各經催升米毫費者除本縣不時訪究外許被索人首告以憑重治

收
一兌米俱要乾圓潔淨有將不堪米強納者許稟究毋得容

一小船戶陸續載米赴倉每米一石止許口食米一升二合船錢八釐

一保歇及堂衙一應人役有倚官需索誑騙者許諸人首告

立究

南昌府進賢縣爲懇覈兌准細則清減船兌脚耗永甦民困事竊照進賢丁糧數寡差繁賦重極苦漕兌水運幸蒙恩庇俯從末議允建兌倉批示遵守四年軍足民餘每歲餘米已經清覈變價共銀一千零五十二兩七錢一分九釐申詳貯庫畱抵正賦外靜思糧從則派米從何餘餘不歸民官無實惠案查往昔船兌官民米每石除兌准正副米外則派脚耗米三升四合八抄五撮三圭四粟共脚耗米一千六百四十二石二斗七升七合七勺卽今倉兌脚耗米內止用扒蓋米一百五十六石四斗二升七合四勺八抄七撮一圭二粟每

艤議單外增補潑撒米六石共用米二百七十四石六斗三升三合六勺七抄五撮六圭二粟用下軍船脚米三百六十六石一斗七升八合二勺三抄四撮一圭六粟又用小剝船米四十八石六斗六升三合一勺六抄四項共用米八百四十五石九斗二合五勺五抄六撮九圭緣因允建兌倉以來革去大船經催自雇小船運米上倉卽回未扣口食此宜有贏米者一免僉解頭四十餘名止僉批頭十二名自有公費供給未扣口食使費此宜有贏米者二對倉授受無甚潑撒遞減多米此宜有贏米者三此米在民以爲惟正之供已輸於官在官以爲無礙之積已貯於庫現今本縣申詳毫無滲

漏但思積餘於官雖在庫而官無支解減徵於民無虧官而民受贏餘況夫歲久弊生奸猾計出及今不爲請減定則將來持籌者萬一藉口則內之米乾沒有餘之糧小民膏脂勢歸私橐雖有兌倉之利與無倉同爲此除倉兌交軍足用及正額難移外今將水兌合減脚耗細則陳列於後伏乞立賜裁減頒則庶贏餘仍在民間倉兌恪垂永利緣係請減兌糧贏餘脚耗米事理卑縣未敢擅便擬合請詳定奪爲此一一開列并原蒙批允倉兌事規刊冊一本具申伏乞照詳施行
今開

進賢縣官民米一石派兌軍正米二斗四升五合七勺四抄

六撮一圭四粟

副米一斗三升二勺四抄五撮四圭四粟

淮安倉正米七升八合八勺七抄六撮一圭六粟

副米四升一合八勺四撮三圭六粟

以上正副二項共四斗九升六合六勺七抄二撮一圭此
向來額編定則不敢請減勺合者也

原船運兌軍脚耗米二升五合八勺三抄三撮三圭四粟

淮安倉脚耗米八合二勺八抄二撮

以上二項共脚耗米三升四合八抄五撮三圭四粟通共
一千六百四十二石二斗七升七合七勺此項脚耗米向

雖額編定則今自倉兌交軍有餘所宜照數減則者也

一兌倉每軍正米五十石合用扒蓋米五斗每官民一石應

派米三合二勺四抄六撮六圭四粟

一每艘議單外旗軍爭補潑撒米六石每官民一石應派米

五合七勺

一正副并耗米一石挑下軍船脚夫米一升五合每官民米

一石應派米七合六勺

一正副并耗米一石小剝船米二合官民米一石應派米一

合一抄

以上倉兌四項止該用脚耗米八百四十五石九斗二合

五勺五抄比船兌計多脚耗餘米七百九十六石三斗七升五合一勺三抄此應照則刊入由票以便徵納

南昌府進賢縣爲懇覈淮兌細則清減船兌脚耗永甦民困事本縣極苦漕運允建倉兌批示遵守四年軍足民餘每歲餘米清覈變價留抵正賦外案查往昔船兌每官民米一石脚耗米三升四合八抄卽今倉兌革去大船戶及多編解頭口食浪費止用後開四款米數其餘贏米積徵在官虛留無碍減徵於民民實受惠於萬曆三十二年六月內請詳院司道府俱各批允將淮兌則內遞減合用正副耗米逐款開後一本縣官民米四萬八千一百八十一石三斗四升六合六

勺

一兌淮正米一萬一千八百四十石三斗八升副米六千二百七十五石四斗一合四勺

一淮安倉正米三千八百石三斗六升副米二千一十四石一斗九升八勺

一扒蓋米每正米五十石該米五斗共米一百五十六石四斗七合四勺每官民米一石應派米三合二勺四抄六撮二圭二粟

一每艘議單外補旗軍撥撒米六石共米二百七十四石六斗三升三合六勺七抄五撮六圭二粟每官民米一石應派

進賢縣志
卷四
米五合七勺

一挑下軍船脚夫米每正副并加耗米一石給米一升五合共米三百六十六石一斗五升一合四勺四抄三圭四粟每官民米一石應派米七合七勺

一小船剝米每正副并加耗米一石給米二合共米四十八石七斗二升二合七勺四抄六撮五圭五粟每官民米一石應派米一合一抄

以上四項原額脚耗米一千六百四十二石三斗七升七合七勺今改倉兌減除米七百九十六石三斗六升二合四合三抄七撮五圭實派用米八百四十五石九斗一升

五合二勺六抄二撮五圭官民米原額每石派脚耗米三升四合八抄五撮三圭四粟今減除米一升六合五勺二抄八撮四圭四粟實派米一升七合五勺五抄六撮九圭每官民米一石實通派正副耗米五斗一升四合二勺

一京米通縣減船錢銀一百兩每官民米一石減銀二釐七絲五忽五微 以上番志

熊明遇進賢縣漕倉定兌碑記

江以西賦法歲漕轉脫粟以輸太倉稟六師從河渠之便則無不漕之縣矣進賢賦粟近四萬四分其一以民漕南京軍漕復二之亦民漕於會省而交兌焉先是裝粟于舟以待漕

艘稱不便仁和寓庸黃公始建今水次倉計都選一人領運貯粟與軍交兌二十餘年矣然每歲不能無利害利害視爲政者田農淳直之民有事于漕卒無異羣羊遇狼狗拮据藉手竣役不挫產爲幸何利之有第害擇其輕則歸與老幼歌呼稱慶也乃天啟末巨璫擅國矯旨出私璫監護漕轉罔密而文峻爲政者凜凜救過不給漕卒之勢益張虎而翼矣卽南昌衛漕卒吾郡屬也家于郡其勢爲主下縣之民反爲客則擇肉其孱弱者且繕艘最後竣事獨遲彼釋耒耜而矯居省會以待漕疲于奔命矣惟廣信所漕卒爲外屬以吾縣視之其勢彼反爲客繕艘銜尾齊來竣事無時日之稽費省而官惠向來以艘兌吾縣惟去年係他官假守并十艘爲何縣奪去則盡兌于南昌衛民純客軍純主害得其重有挫產以償耳幸今新天子撫運誅巨璫盡撤璫之監護錢糧兵馬者民旣欣欣急公如天之福又獲借晉江蔣公鍾湖自東鄉調來名家茂齒擅才力敝賦不索而完乃持牘請于治粟監司陳公九巖曰功令隨到隨兌今進粟到廣信所軍艘亦到不此之兌而復待他艘之參差非以一法令示民信也陳公奮然曰可哉而郡太守彭公觀民監漕理沈公鍾岐並慫慂出一口于是盡進粟二萬四千悉兌廣信軍艘四十有六不出十日而竣矣粟無蒸浥雀鼠之耗凡足輸軍官復革其餘糶

之陋無害可擇公私太悅而舒文學偕里父老介余子侄輩聚族而叩曰微仁侯之惠不及此曷碑而記諸使自是歲歲令進民與廣信漕卒交兌有四懿焉耳目馴習誼譁不生一也艘至早兌省僑寓飲食二也米無蒸滷不挫產以償三也餘糶盡革官有清譽民無苦科四也熊子聞而善之曰懿哉爲政之良非能家賜而人益之也調之而無它愁擾因軍民之剛柔燥濕而先後其劑焉是君子不費之惠乎夫害莫大於求利而利莫大於無害向年怵于轉漕之害重輒倩豪猾猾禍人與軍闌擇輕害爲幸今并輕害而無之歸而與主伯亞旅宣力南畝嗣歲父老子弟領運者視今年爲成法五尺童子借箸爲籌莫之或欺異時爲政於吾郡吾邑者矜式今年郡邑諸君子成法尚望其遊意於法外爲惠於法內忍變法耶豈非吾邑百年之利哉是可以記矣蔣公名德瑗晉江人乙丑進士始終監護有勞者則主簿沈一匡也

常豐倉在縣治南來撫門內嘉靖初知縣胡斐重建此官府積穀倉 便民倉在縣治北城外烏石山下嘉靖甲申知縣吳大本建此收東西南三鄉兌米倉 三陽倉縣治北六十里三陽渡水次爲兌淮米設 土坊倉縣治西五十里卽土坊鋪爲便儲西鄉兌淮米設嘉靖戊申知縣周美建 東鄉倉池溪橋舊翁家嶺鋪萬厯間知縣王亮改于潤安題曰潤安便民倉 西

鄉倉在二都藍田 南鄉倉在十二都臧溪 北鄉倉在八都白岐山以上八倉自知縣黃汝亨改省兌倉後俱裁

縣志

邑人萬福常豐倉記邑預積貯備荒也倉以常豐名志有也進賢故倉五南北久廢東傾頽過半西僅存值兵歉寡哀常豐亦淪廢焉侯來涖茲邑首重民命往視倉嘆曰豐凶數之常儲積令之責弗厚其積曷備其凶矧倉阻城外脫有急則中外戒嚴適爲敵資吾何利用是謀併之會大叅嚴公來按縣嘉侯議焉遂助贖金成厥美迺正德辛巳秋七月爰徙東西併入城中同衆志也不費公帑以糜民財捐已俸也密其茨覆崇其垣墉垂經久也左右對峙鱗次翼張廣儲蓄也廳事高明簷楹深邃便出納也嘉靖始元六月吉告成邑人咸走視之老者駭其崇稚者誇其壯守者喜其完輸者樂其便且邇也先期遴董厥事耆老黃貴徵予文以紀予惟傳說曰有備斯無患管子曰倉廩實而知禮節侯其有焉噫侯之善政奚翅此哉利民祈報新厥廟也便民通濟葺厥橋也固民保障石厥城也皆侯愛民之志之緒也召杜父母何忝哉是用勒石以垂不朽云侯胡姓名斐字時章浙之金華湯溪人登正德甲戌第居是以文學政事名

邑人萬鏗便民倉記邑大夫南峰吳侯涖任之明年爲嘉靖甲申其夏四月始作倉於縣北關外里許石龜坑之陽父老

有過予者曰便矣哉此倉也問之故則曰縣北六十餘里三陽水次有倉焉直下鄉居民便耳此倉之設上鄉其胥便乎旣而倉成侯日臨視之槩量以平納受無滯章程畫一周敢撓則又謹曰倉誠便哉糧之旣入矣晒糧有場焉藉於地有木若板焉左不百步有通河焉可以免沍爛之虞可以直達交兌之所司納者則又稱曰此倉寧獨爲輸者設哉倉之地因於養濟院故基其材木取之集善諸廢寺故料而一切雜費咸出綜畫民罔聞之則又曰侯不欲擾我而遺我以便一至此哉予聞而私念之以爲始之言便者統其大也再三舉其詳也終焉所謂便之便者也侯先立於其大者則諸便從

之矣必若名倉其便民乎一日侯語次及倉予述以告會侯白事會城巡撫中吳盛公問倉名云何侯舉余言以對公亟贊之及諸當道褒許無異詞於以見豈弟君子一念爲民之誠獲上信下其響應固若此哉侯今以風憲檄徵矣邑倅嘉禾顧君傳謁予以記予固倉中之一便民也誼焉辭乃諭於衆曰爾等昔言倉之所便者至矣復何進焉然亦知夫此又有便者乎夫糧儲爲國家命脉而實資之於民旣便也則歲運可充京儲有濟斯不亦便國矣乎衆曰然予又曰倉以便民而國因之便固矣亦知夫有不便者乎衆聳然以思予曰昔惟三陽倉歲委之寮屬耳今得省監視之勞避繩察之

怨或因而交征爲利者亦有之今則勞矣且任怨矣利源塞矣於身圖奚便焉惟侯不徒便其身故爾民有此倉之便也且侯之不自奉自佚自遂自賢以求便爾民者豈值倉哉茲特其可見者若甘棠峴碑然耳衆咸謝曰懿哉探本之論非吾儕所及也相率以復於顧君君謂予曰吾聞之爲政者其上便民其次便國其下便身先生之言匪倉斯記所以詔吾人者切矣繼自今寧無覩倉興思時其修葺以永永其便者乎請遂勒之昭示無斃倉爲廩十三間均若一倉之中稍後爲廳事又後爲退居其前爲大門間各視廩之數繚以周垣丈計之百有二十其夏六月辛丑落成距始事日周甲子而僅加五也侯名大本字性夫正德辛巳進士爲宣城望族南峰其別號云

邑人雷夔麟潤安便民倉記臨海王公治進邑凡事之便於民者亟舉之民咸侯志焉有二十二都于希孔者議立倉於潤安都之人稱便上其議於司府皆稱便乃因古社學遺址環以墻中爲公廳前爲門左右爲倉里各用其一而裕也倉成民以時輸而自運焉旣不失公家之賦又以餘餉守者而足也噫便矣哉請於公命之曰潤安便民倉書足國裕民於廳語曰百姓足君孰與不足故足國者先裕民裕民者先便之仁人之言有本哉愚生長茲土願言其所以便按舊規凡

兌軍米皆貯三陽倉以竢其地在縣之北七十里以水所會舟車所通也然民之附於郭散處於東西南之各鄉者或踰百里而輸或踰七十里而輸東越軍湖西浮白沙茫然萬頃其勢不得速達而督責之苦催僱之勞交剝守候浥溺之費無紀矣其後宣城吳公立倉於縣北關附郭以南之民便焉崑山周公立倉於土坊西之民便焉獨東無以立者民不便甚則告而自立在十六都則迴龍溪在二十二都則今潤安皆得併力自運他無所擾焉視官所立倉尤爲便矣蓋民之所立若已有之立之不苟且修之不怠緩無傾圯之患焉倉之所在相去不數里朝至而朝輸之暮至而暮輸之輕車熟

道風雨不廢無險阻之患焉且一鄉之中十年之內征輸相代彼不得少負此不得多取卽有逃亡業之所屬舉相知也無逋賠之患焉民自輸之民自運之不越都而代焉多者主之少者副之不偶語而足焉卽有所費皆爲己出且衆擎易舉也無虧累之患焉上不煩於審編下不容於營脫歲之所值各蚤計之卽有奸頑鄉之公評不可昧也無規避之患焉愚故述而紀之俾後之爲治不失公之意焉則民之便也永矣噫十六都便矣而十五都則遠者愚以爲附迴龍溪便二十二都便矣而十七都十八都則又遠者愚以爲附潤安便而民莫以告者無于希孔若人者之倡義也姑書此以竢

漕倉兌米埠頭 在省城進賢漕倉前左邊直下抵河嘉慶八年邑人十六都林元清捐貲價買靖安縣鄭正廷店基公眾爨石砌成永爲合邑泊船兌米公路其基地契載前橫一丈三尺後橫一丈四尺東至謝店西至劉店南至河北至官街價貳百壹拾千文契存林姓

